



**Qaanaami, Illoqqortoormiuni, Taasilami taakkualu nunaqarfiini nannunik aarrinik qilalukkanillu piniarnerup killilersorneqarunnaarsinnaanera, nunatta nunanik allanik isumaqatigiissutaasa pisussaaffiliinerisa iluani, periarfissaanersoq misissoqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortat Lars Mathæussen, Siumut)

(Siullermeenera)

**Kitaani ukiukkut aaffanniartarnerup januarip 15.-iat aallarnerfigalugu martsip 15.-iat ilanngullugu ingerlanneqartartussanngorlugu Naalakkersuisut Aavernik illersuineq piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersoq-p allanngortinneqarnissaannik peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Nikolaj Jeremiassen, Siumut)

(Siullermeenera)

Demokraatini isumaqarpugut, nannunik, aavernik, qilalukkanik qernertanik qilalukkanillu qaqortanik pisasseeriaaseq pisariaqartoq qularnaarumallugu kinguaassatta aamma uumasunik taakkunanga piniartarsinnaanissaat. Taamaattumik siunnersuut saqqummiunneqartoq taama nipeqarallartillugu ilalersinnaanngilarput.

Demokraatini isumaqarpugut piniarfissanik piffissalersuineq Aalisarnermut, Piniarnermut Nunalerinermullu Naalakkersuisup suliassarigaa. Piffissat piniarfissat aalajangersarneqartarput susasaqartunut tusarniaasoqareeraangat. Piffissat piniarfissat aalajangersarneqartut tamatigit isumaqatigiuaannarneq ajorpagut, taamaakkaluartoq isumaqarpugut naliginnaasumik Inatsisartut sinaakkusersuisariaqartut piniarnermullu piffissat pillugit tunngavissanik aalajangersaallutik taava Naalakkersuisut piniarnermi piffissat eqqortut aalajangersartassavaat.

Taamatulli oqareerluta Demokraatini ilaannikkut eqqumiigisarparput sooq Kalaallit Nunaanni nannut aquneqassanersut pisasseeriaaseqarneq tunngavigalugu. Pisassiisarneq tamatigit isumaqartuaannarneq ajorpoq. Assersuutigalugu ukiut tamaasa nannut tallimat missaat avannamukaartarput kujataata kitaa aqqusaarlugu. Pisarineqartuaannangajapput, ukiumulli pisassiissutit nungussimappata, nannut piniarnermut nakkutilliisumit pisarineqartarput, allaniunngitsoq. Aamma siunnersuuteqartup oqarneratut nannut amerliartuinnartut Tunumi illoqarfinnut annguttalernikuupput.

Pisassiisarneq qimallugu sumiiffik aallaavigalugu piniarneq aallaavigalugu aalajangersaasoqartuuppat nannut inoqarfinnut qallivallaartut tamarmik pisarineqartalissagaluarput parlattuanillu nannut ungasissumiittut



eqqissisimatinneqalissagalarput. Pisineqartartut amerlassusaat nikingaarnaviangilaq  
qaavatigut nannut inoqarfinnut qallivallaartartut pisarissersuutaasarnerat millissagalarpoq.

Siunnersuutit matumap itigartinneqarnissai inassutigaarput.